



## **Georgina Hendry-Bear**

naschia ils 3 da mars 1930

morta ils 29 d'avrel 2005

E gliez san ins, l'ura dalla mort ei destinada per in e scadin, ed ei dat buca caschun da mitschar. Tuts rampins ed era la pli ferma giustificazion encunter disdescan. Pli baul vegneva ei rugau, ch'il Segner pertgiri ins dalla mort anetga, ed oz..? Ussa, che gleiti mintg'auter metscha buca dallas greflas dil cancer. Quei fa sgarschur. Ins sa bein esser dil mein, che l'ura dalla mort seigi da perpeten enneu gia fixada ed ins sappi far nuot encunter, tut mo destin. Meglier tschell'uisa, la mort ei nuot jastra, ella ei ferma cumpart dalla veta terrestre. Pia, ina part stretga da nossa veta, che sa ed astga buca vegin dividida naven da nies tgierp e da nies spért. Ella termineschia gie sulettamein noss'existenza corporala cheu sil mund, ei denton gest quei mument il passadi vi en la perpetnadad. Aschia eis ei bien e recumandeivel, da sedar giu ad uras cun quei fatg e da dar cavegl a quei che sauda.

## **Affonza e famiglia**

Gliez di, ils 3 da mars 1930, il di da naschientscha dalla Gina, eis ei bein entrau per in batterdegl silenzi e ruaus en la fravia dils «Mengits» odem Sedrun. Ella, sco emprema buoba ella roscha dad 11 affons dils geniturs Clau Antoni Beer ed Annamaria, naschida Pally. Bein ha ella gudiu el ravugl da quella gronda famiglia ina affonza pleina da plaschers e da travaglias. E senza puppergnems eis ella sefatga oreifer, cunzun ell'educaziun. Ha fatg bia plascher als geniturs ed ha dau beinspert bien maun alla lavur. Ina mattatscha fetg inschignusa e beinvulenta. Quei ei stau ordvart d'engrau als giuvens geniturs: trer si e nutrir ina semeglionta famiglia da quels onns sco mistergner, quei ei stau tut auter che sempel.

Terminai ils onns da scola, ha la Gina stuui ir immediat egl jester en plaza. Ina bucca dameins davos meisa ed igl agid cun las finanzas dalla famiglia, tgei benefeci. Quei ha ella fatg leu en differents hotels e pli tard cuntuau quellas lavurs en Tujetsch schizun entochen cuort avon la mort. Sia curteseivla e sincera demanonza, luvrusadad ed aviartadad han anflau beinspert access tier ils patrunz.

Ins ha schazegiau quels duns ed era tratg a nez quei fermamein dalla defuncta. Pli tard, cura ch'ei ha fatg basegns eis ella segidada da camifo culs geniturs. Ha dau cavegl, giu quitau e tgirau els entochen la mort. Cheu ha ella recaltgau bia stema. Nus, Tes fargliuns, engraziein a Ti da cor per quellas ovras.

Igl onn 1956 sespusescha la Gina cul giuven Vigeli Hendry da Surrein, in dils respec-tai calgers da Sedrun. Ils 6 affons da quella lètg han purtau als geniturs bia plaschers, mo bein era lavur tut a dubel ed enzatgei fastedis. Gia 1970 miera il fegl Linus ella vegliadetga da mo 5 onns en consequenza d'ina greva malsogna. Lu suonda la mort prematura dil mariu Vigeli igl onn 1991. Quellas sperditas ein stadas grevas per la mumma e per la famiglia. Denton, la Gina ha buca lamentau ni stada a bandun. Anzi, ella ha priu las hottas en maun e semplamein fatg quei ch'era da far.

## Trapass

E sco tut pren baul ni pli tard ina fin, aschia era tier la defuncta. Venderdis, ils 29 d'avrel 2005, ha il Segner clamau la Gina. All'entschatta digl onn niev ei ina maldis-postadad sefatga e gia suenter 3 meins ch'ils miedis han giu constatau il cancer, eis ella spartida. Quei cuort temps ha tunschiu ad ella dad acceptar, da schar dar e da prender cumiau dalla cara famiglia. Bein ei quei stau grev e nuot sempel per ella. Denton, igl agid e la vischinanza dils affons duront quei temps el spital, ein stai per ella sco mel pop.

L'entira veta ei la defuncta stada ina femna da buna cumpignia. Cun siu affar nun-cumplicau ha ella gudiu respect tier ils vischins. Oravontut carezava ella il temps da tscheiver, cheu era ella egl element. Entuorn la Gina stevan ins bugen, ed aschia lein nus mantener ella en nossa memoria.